

Donostian, Diputazio Jauregian, 1982.eko Azaroaren 26an, egin du Euskaltzaindiak, arratsaldeko lauretan, hileroko bere batzarra. Bildu dira: L. Villasante buru, J. Haritschelhar buruorde, P. Altuna, A. Irigoyen, E. Knörr, F. Krutwig, P. Lafitte, E. Larre, F. Ondarra, J. San Martin, J. M.^a Satrustegi eta A. Zavala euskaltzain jaunak; L. Akesolo, J. A. Arana, X. Aranburu, M. Atxaga, P. Charrington, J. Etxaide, J. G. Etxebarria, X. Kintana, I. Laspiur, J. L. Lizundia, A. Zatarain eta J. J. Zearreta euskaltzain urgazle jaunak; J. M.^a Satrustegi jauna idazkari dela.

Ezin etorria: J. L. Davant, X. Diharce, J. Hiriart-Urruty, P. Larzabal eta L. Mitxelena jaunak adierazi dute.

Aurreko agirian, J. L. Davant jaunaren izena ez dela agertzen, jakinerazi da.

Ohi den otoitzarekin hasi da batzarra.

Goizeko bilkuraren berri

Hauteskundeak. Euskaltzainburugoko karguen bigarren urteburua denez, hauteskundeak egin dira goizean. Agiri bereziak dioen eran, hamabi euskaltzain etorri dira eta beste bostek eman dute idazkiz beren botza. Atera dira: L. Villasante, euskaltzainburu; J. Haritschelhar, buruorde; J. M.^a Satrustegi, idazkari eta E. Knörr, diruzain. Era berean berriztatu dira beste kargu hauek ere: Iker Sailburu, L. Mitxelena; Jagon Sailburu, J. San Martin eta liburuzain, A. Irigoyen.

Beste gai batzuren artean, honako hauek aipatu dira:

1936.eko gerra denbora eta ondoko urteak nahiko ilun dira Euskaltzaindiaren historian. Erdal Akademiako P. Sainz Rodriguez, orduan Hezkuntza Ministeritzako arduraduna zenaren bidez jakin dugu, Euskaltzaindiaren etorkizunarentzat garrantzitsu den, berak hartutako erabaki bat. Gerra osteko **Euskera** aldizkaria birrargitaratzean, ezagutzen ez ziren batzar agiriekin batera, denbora horretako berriekin txosten bat ere plazaratzea erabaki da.

Euskaltzaindiko bulegolanen sailkapena egin beharra ikusten da eta horretarako jardunaldiren batzu sartuko dira 1983.eko lanen egutegian.

Urteko gure eginkizunen agerpen zehatz bat zor diogu Euskal Herriari. Garrantzitsua puntu hau dirulaguntza ematen digutenen aurrerako, batez ere. Horretarako, idazkari nagusiak eta batzorde bakoitzak beren memoria egin behar izango dute urte amaiera honetan.

Batzorde agerpenak

Argitalpenak. Argitalpenen egoera aztertu ondorean, hau da eskuartean darabaguna: **Euskera** 1982-1, azken zuzenketak eginik laister kaleratzeko dago. IKER-2 erdi egina dute inprentan eta denbora berean zuzenketak egiten doaz. JAGON-1, Iparragirri buruzko alea, argitaletxearen abiadan doa. JAGON-2, Bertsolariei buruz oraintxe emandako hitzaldiekin mamituko da. Hizlariak zuzenketaren batzu egiteko epea daukate.

Lekukoen bilduman, bost ale agertu dira orain arte eta beste seiren bat datorren urtean ateratzeko aukera ikusten da. Ia gertu daude lan hauek eta finantziabidea ere lortua.

Euskaltzaindiaren historia laburra aspaldi eskuartean daukagu, eta azkenean euskaraz, gaztelaniaz, frantsesez, ingelesez eta alemanez argitaratzea erabaki da.

Gerra aurreko **Euskera** aldizkariaren birrargitalpena bosgarren alean doa. Otsailerako aterako dira beste aleak.

Pertsona Izendegia ere aurrera doa eta Urtarrileko batzarrean eman ahal izango da zerrenda berria euskaltzainei.

Azkueren *Euskalerraren Yakintza* izeneko liburua birrargitaratzeko, baimena eskatu du Espasa-Calpe argitaletxeak. Denbora berean, hitzaurre baten beharra adierazten dute zuzendariak. Euskaltzaindiak, beste alde, rr, ll eta tt bikoitzak erabiltzea gomendatzen du. Jose M.^a Satrustegiri eskatu zaio hitzaurrea egitea.

Azkenekoz, Rosa M.^a Arzak, Euskaltzaindiaren liburu-gordailuko berri eman du, urteko sar-atera eta gaurko egoera adieraziz. Zenbait liburuk irteera txarra dute eta metaturik daude. Horien salmenta nolabait bultzatzea beharko dela, ikusten da.

Txostenak

Euskaltzainburuak ongiatorria eman dio Jose M. Larrarte jaunari lehen aldiz batzarretara bait zetorren. Larrarte jaunak "sintagma mugagabea Tartasen *Ontsa hiltzeko bidea* liburuan" aztertu du. Gramatika gaietan gabiltzanez, eskertzekoa da bere txosten luzea.

X. Kintana jaunak merkatalgo arloan beren emaitzak euskaraz agertzen dituzten etxeen aipanena edo/eta agiriren bat egitea eskatu du, beren ekintzaren bultzagarri. Ez da garbi ikusten Euskaltzaindiari dagokion ala beste Elkargoren batek egin behar lukeen.

Eta besterik gabe amaitu da batzarra.

Euskaltzainburua
Fr. Luis Villasante

Idazkaria
Jose M.^a Satrustegi